

# Defender l'Europa


## Nua va l'Alleanza atlantica?

DA GUIU SOBIELA-CAANITZ

■ **En Engalterra e Valisa ha il pievel suveran giavischà da bandunar l'Uniun europeica (UE). Quai è ses dretg e vegn segir a daventar, ma na munta betg la fin da l'Europa. Ina retschertga d'opiniun realisada dals 28 da zercladur als 6 da fanadur en Belgia, Frantscha, Germania, Italia, Pologna e Spagna «mussa ils progress dal sentiment europeic en quests sis pajais» («Le Monde» dals 15 da fanadur).** En Scozia han regenza e pievel confermà ch'i n'acceptian betg per sazezs la decisiun d'ina maioritad britannica e ch'i sajan buns da batter per restar en l'UE. Quai na dependa dentant betg mo da lur voluntad, mabain era da lur pussaivladad da defender la libra disposiziun da lur pajais. Suentar la Segunda Guerra mundiala n'han pliras naziuns oz commembras da l'EU betg pudì decider sezzas da lur destin. Decennis a la lunga hani stuì supportar l'imperialissem sovietic. Pir cun la fin da lez sistem hani pudì construir democrazias segir imperfetgas, ma che devan e dattan al pievel ina libertad ch'ins n'enconuscheva tuttina betg sut il communissem. La Russia percunter ha violà il dretg internaziunal il 2014, occupond parts da l'Ucraina ed annectond la Crimea. Quai ha alarmà ils tschintg pajais da l'UE limitrofs da la Russia e da sia exclava da Caliningrad: Estonia, Finlanda, Lettonia, Lituania e Pologna. La Finlanda è neutrala sco sia vischina, la Svezia; tschels quatter pajais fan part da l'Alleanza atlantica dapi 1999, en il cas da la Pologna, u 2004, sco ils pajais dal Balticum.

### Inscunter suprem a Varsovia

In manual geopolitic publictà il 1993, curt suenter la fin dal «bloc da l'ost», scriva: «L'Organisaziun dal pact da l'Atlantic dal Nord ('North Atlantic Treaty Organization', Nato) è la principala structura politica e militar integrada en il 'bloc dal vest'. Ins l'ha stgaffida en il context da la guerra freida (...) en avrigl 1949 'per mantegnair pasch e segirtad (...) en la regiun da l'Atlantic dal nord' (...). Ella ha surventschì senza battaglia [1991] il pact da Varsovia. Perquai ha la paradoxalmain pers ses equilibr. Ella



Ils stadis commembers da l'Alleanza atlantica (Nato).

sto chattar ina legitimatad nova, definind danovamain sia strategia, ses duairs, sia organisaziun e sias pussaivladads, en connex cun privels novs (...). Da l'autra vart vulan stadis da l'Europa orientala adina pli numerus aderir a la Nato per giudair sia protecciun sche la Russia turna tar sia politica dominanta tradiziunala» (1). Quai è stà il cas il 2014 en Ucraina (45,2 milliuns olmas). La Nato dumbra oz 28 commembers (2); ils schefs da lur stadis e regenzas èn sa rinnads a Varsovia. «Le Monde» dals 7 da fanadur scriva: «La Nato è turnada tar sia funcziun istorica fundamentala: La defensiuun collectiva visavi la smanatscha russa (...). Ina tractanda tunava: Rinforzar la cooperaziun cun l'UE (...). Ils presidents dal Cussegl europeic e da la cumissiun, Donald Tusk e Jean-Claude Juncker, eran giasts imprevis.» «The Economist» dals 2 da fanadur punctuava: «Il privel russ vegn a dominar l'inscunter. La Nato è cunzunt preoccupada da l'exclava da Caliningrad (...) nua che la Russia dischlochescha brigadas mecanisadas, tancs, sistems intercontinentals da defensiuun cunter aviuns e rachetas nuclearas; lez district è ina da las parts d'Europa las pli militarisadas» (p. 26). «The Economist» dals 9 da fanadur precischa: «Il grond quità da la Nato è il corridor da Suwalki, tschancun da 100 km sper il cunfin tranter Lituania e Pologna, tranter la Bielorrussia e Cali-

ningrad (...). In'attatga russa, da la Bielorrussia tras il corridor vers Caliningrad, tagliass giu l'access da l'Europa dal vest vers il Balticum (...): Lez pudess ins lura proveder mo tras Svezia e Finlanda (...). Questa manegia che la pussaivladad d'aderir a la Nato dissuadia tuttina la Russia da l'attatgar. Ma l'aut diplomat finlandais Jukka Salovaara manegia: 'Sche la situaziun vegn spert mendra, n'avessan nus betg pli temp per annunziar nossa adesiuun» (p. 21). La citad da Suwalki è situada en il district polac da Podlaskie.

### Rinforzaments defensivs

Ils tschintg commembers da l'UE limitrofs da la Russia (142,8 milliuns olmas) teman pia lur grond vischin. Lez arranscha mintga 9 da matg ina preschentaziun starmementusa da sias armas las pli modernas per commemorar l'armistizi victorius da 1945 e persvader il mund da sia pussanza militar. La Russia ha dal rest retegnì insaquant intschess acquistads 1944 e 1945, numnadamain il district da Caliningrad, ina strivla arctica en Laponia (Petsamo/Petschenga), la Tuva en Sibiria e pliras inslas da l'Ocean Pacific. In'attatga russa cunter il Balticum pudess conquistar ils trais stadis en pauc dis. La Nato duai pia persvader Moscau ch'ina tala attatga na valless la paina. Ses stadis duain far tut il pussaivel per evi-

tar acziuns che la vart russa pudess interpretar sco provocaziuns. La Nato na vul pia mumentan acceptar nagin commember nov. Ma co fissi sche la Finlanda (5,4 milliuns olmas) e la Svezia (9,6 milliuns olmas) sa sentissan uschè smanatschadas ch'ellas s'annunziassan ensem per in'adesiuun cuminaivla? Quai fiss lur bun dretg. Qua sto president Vladimir Vladimirovitch Putin sez evitar tut quai ch'ins pudess interpretar sco ina provocaziun. Sa basond sin Caliningrad pudess el conquistar en paucas uras, per exempel, l'insla svedaisa da Gotland. Po'l resister a l'empruvament? «Putin sa fitg bain profitar da las flailvezas d'auters pajais» («The Economist», 23 d'avrigl 2016, p. 29). Las decisiuns da l'inscunter suprem a Varsovia miran d'al persvader ch'el stuess lura supportar consequenzas malempervailas. Dentant: «Ins n'astga betg survalitar la relevanza militar dals quatter battagliuns da la Nato. In'eventuala agressiuun scuntrass immediat schuldada da la Nato (...). Ma in battagliun na pudess cuntanscher bler cunter la predominanza russa. El pudess mo retardar l'invasiuun enfin a l'ariv da rinforzaments. La preschientscha dals quatter battagliuns da mintgamai tut il pli milli schuldads fiss clermain defensiva, schebain che la Russia als numna 'smanatschas» (NZZ dals 8 da fanadur 2016, p. 7). Quels battagliuns duain esser multinaziunals, cun participaziun dal Canada, da la Germania, da la Gronda Bretagna e dals Stadis Unids. Londra vul pia far part da la defensiuun da l'Europa orientala, malgrà sia sortida da l'UE. Co va quai vinavant? «Ils experts militars da la Nato èn persvadids che Putin n'haja betg en senn d'attatgar ils cunfins da l'alleanza. Dentant èni preoccupads da la tenuta incalculabla da Moscau» («Le Monde» dals 7 da fanadur). I ston pia restar prontos en cas da surpraisa.

1. Yves Lacoste (ed.), *Dictionnaire de géopolitique*. Paris (Flammarion, ISBN 2-08-035101) 1993, pp. 117-118, chavazzin «Alliance atlantique».

2. Albania, Belgia, Bulgaria, Canada, Croazia, Danemarc, Estonia, Frantscha, Germania, Grecia, Gronda Britannia, Islanda, Italia, Lettonia, Lituania, Luxemburg, Norvegia, Pajais Bass, Pologna, Portugal, Rumenia, Slovachia, Slovenia, Spagna, Stadis Unids, Turchia, Tschechia, Ungaria.